



Tir Yimym

www.tiryimym.in


Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3 Yangia anidakangma : Tir Yimym tiryimym@aolima tir yimym TAPAK 8

Sorkari Brij aputsüla, mesüra aluyimertemia longkak aittsü

Saudi Pro League ya alima nung league tajungtiba ka akumtsü



VOL. XX NO. 231 (ADOK 231) DIMAPUR KÜPTOKNÜ (SATURDAY) AAMI (JUNE) 03, 2023 ₹ 5.00

NSF-i tejashi sayua wako tanak atsüket

Kohima, June 2, 2023 (TYO): Naga Club ki raksatsürtem pua marutetba atema tejashi sayua Naga Students' Federation (NSF)-i tanü wako tanak atsüketogo.

Hokolbarnü NSF-i tejashi sayua khen atema lapoka aliba parnok office nung wako tanak ka atsüket aser May 27 nü NSF Oking, Naga Club building raksatsüba anema banner ka ayu.

Iba tesem ya Naga nunger ajak atema heritage site ka lir saka nübertemi memetetba Naga Club züngsemtemi raksatsü ta banner nung shia lir. NSF-isa iba mapa

inyakertem tekaratiba nung aputsü aser temeten agütsütsü takhangba agütsüogo.

"Iba mapa inyakertemi yimjak nung tenüng agiaka bangdakpurtemi parnok dak mapa meinyakba atema tejashi sayua iba mapa inyaker" ta NSF-isa. NSF indang federating units aser sub-ordinate bodies-i onok kanga pusema nungiter ta NSF media cell-isa metetdaksü.

College balala nung kaketshir teloktemia wako tanak atsüketogo aser temeten meshia placards sayuogo ta NSF-isa.

Nagaland nung load shedding asütsü

Dimapur, June 2, 2023 (TYO): Hydro Power Stations nungi power peria manguba aser Nagaland nem power ajema agütsüba ajanga load shedding asütsüsa akümer ta Department of Power Nagaland(DoPN)-i metetdaksü.

Dimapur, Kohima aser Mokokchung load centre tem nung mapang lemsar load shedding asütsü ta parnoki ashi.

Nagaland nung power 180 MW (60MW during the 1990s) shi nüngdaker aser iba nungi 147 MW shi angur. Nagaland indang Likimro Hydro Electric Project ajanga anogo nungi ghonda 12 atema 24MW adoktsüla saka tzi shiak maliba ajanga 6 nungi 12 MW tashi dang adoker ta Chief Engineer, Department of Power-i sangdong ka nung ashi.

"Tesüba anogo ishika kanga tatsük akümba ajanga power kanga nüngdaka aküm. Iba jagi tesemaika nung aser talisa Dimapur aser temeket nung distribution transformers aika arong" ta sangdong nungsa shia lir.

Nagaland asoshi power teimtiba angubaji Tripura nung aliba Palatana Thermal Power station nungi lir saka June 2, 2023 nungi annual maintenance atema iba Power station shibangtsü anungji iba ajanga

asenok power peria mangutsü ta DoPN-isa metetdaksü.

Power peria manguba khuret asoshi department-i khen atema jenjang tasakba agi additional power alizüktsü atema mapa inyakdar. Ajisiüka load shedding asütsüsa akümer anungji Department-i load centre asem-Dimapur, Kohima o Mokokchung nung mapang lemsar load shedding asütsü ta DoPN-isa metetdaksüogo.

Küm shia Nagaland nung power peria manguba aser load shedding timtem ajurua arur kechiyong asenoki nüngdakba power 90% tashi tangalen nungi dang bener arua atsüker. Iba khuret koktetsü atema Nagaland nung Hydro power generation renloktsüla aser iba maparen nung department-i tetsükdaksü kar ajurua lir ta parnokisa ashi.

Tanü air conditioners, refrigerators, water boilers aser rice cookers amala amshiba ajanga power teimba nüngdaker anungji nübertemi electric osettem mamshidangbo off süa yur electricity kümdanga amshitsü mepishir, ta DoPN-isa ashi.

Parnokisa tziungluruwa aruba sülen power tensa tajungba akümsü nanzükba den nübertem dang timtem arema atatsü mepishia metetdaksü.

Manipur nung nisung 98 asü, 310 yiru: CMO

Imphal, June 2, 2023 (Agencies): Manipur nung ita ka jakdang mepetmesü adoker raratepa arudang nisung 98 asü aser 310 yiru ta Hokolbar Manipur sorkari metetdaksü.

Iba lendong ajanga relief camps 272 nung nisung 37,450 jenoka lir ta Chief Minister's Office (CMO)-i ashi.

May 3, 2023 nü mepetmesü adokba sülen mi senoktsüba ken o 4,014 benoka lir. Tesüba ita ka tsünga police-i ken o 3,734 benokogo aser nisung 65 tashi ozüng alema inyaksangshiba atema pua lir ta CMO-isa metetdaksü.

Lendong ataloktsü ana nung aliba tesemtem nung Army, Assam Rifles, CAPFs aser local police mapa lezmükja lir. Tang tashi nung central armed forces company 84 tashi mapa lezmüka

lir ta parnokisa ashi.

Tang tashi nung security agencies-i prangpong 144 den 11 magazines ngutetogo. Nisung kar ket nung sepaitem dang nungi rakzüka bener aoba prangpong aser injang bena aliba putetra ozüng tesashi agi merenshitsü ta CMO-isa metetdaksü.

Imphal West, Imphal East, Bishnupur o Pherzawl nung ghonda 12, Kangpokpi nung ghonda 11, Churachandpur o Chandel nung ghonda 10, Jiribam o Tenugopal nung ghonda 8 aser Thoubal o Kakching district tem nung ghonda 7 atema curfew salaogo.

Külen, Tamenglong, Noney, Senapati, Ukhrul aser Kamjong district tem nungbo curfew mali ta CMO-isa ashi.

Dimapur nung journalists atema Media Literacy sentong ka agi



June 2, 2023 nü Hotel Saramati nung American Center, US Consulate General Kolkata Director Adrian Pratt den külemi media literacy workshop nung adenertem agiba noksa ka angur.

Dimapur, June 2, 2023 (TYO): June 2, 2023 nü U.S. Consulate General Kolkata-i Consumer Unity & Trust Society (CUTS) den yaritepa Dimapur nung journalists atema workshop ka agiogo. Iba sentong nung Dimapur Press Club-ia yaritep.

U.S. Consulate Kolkata-i journalist tashi itdaksütsü atema CUTS International den yaritepa iba media literacy indang workshop ya tesem balala nung agiyonga arur.

"Digital putu ajanga asenoki khen nung osangtsüsang balala angazüketeter ajisiüka iba ajanga osangbenertem asoshi tayongzükba aika agütsür" ta American Center, US Consulate General Kolkata Director Adrian Pratt-i ashi.

"Tanü artificial intelligence (AI) ajanga alima tesem balala nung osangtsüsang belenertem asoshi tetsükdaksü agütsür aser osang tai prokshir. AI ajanga osang taila aser tiyazütem shitak ama sayua prokshir aser iba

ajanga newsroom-i tayongzükba jenti ajurur. Anungji osangtsüsang prokshirtemi kanga dang kümdanga kulitem jangjar ang osangtem prokshitsüla" ta Pratt-isa ashi.

"Iba workshop ya journalists-i kulitem kodaser jangjatsü ta asüba inyakyim sayutsü atema agir. Tanü iba sentong ya tier II, tier III cities aser item mesükba tesem nung aliba local media house nungi media nisungtem akangshitsü atema agir" ta CUTS International-Calcutta Resource Centre nung Deputy Head Sucharita Bhattacharjee-ia ashi.

"Media nisungtemi osang tiyazü aser tailatem jangjatsüla aser item anema inyaksüla. August 11-12, 2022 anogotem American Center, Kolkata nung international media workshop agidang Indo-Pacific linüktem nungi osangbenertemi ashiba nung ajemdaker iba workshop ayonga agir" ta laisa ashi.

Tanü sentong nung shisalen sayurji Workshop and Training,

Boom Live Producer Divya Chandra liasü. Lai osang mabensaba aser aibelena prokshiba bendangtetsü, inyakyim balala ajanga online nung osang mabensa aser aibelena prokshibatem aitsütsü, artificial intelligence (AI) ajanga osang tai prokshiba aser kuli tejangja bushitetba indang ocettem züluba tesayuba balala agüja liasü.

Sentong nungsa News and Administration, The Morung Express, Dimapur Director Akangjungla-i o tatsüka jembidang CUTS International ajanga Kolkata workshop nung aika angazükba indang lemsatop. US Consulate Kolkata-i nungita aser South Asian Women in Media (SAWM) o East West Center (EWC) ajanga yaria workshop nung adendang aika ajangshi aser angazük ta Akangjungla-isa ashi.

Iba workshop nung Dimapur aser Kohima nungi journalist 30 tema aden.

Nagaland nung tetsür entrepreneurs asoshi sentong ayongzük

Dimapur, Aami/June 02 (TYO): US Consulate General, Kolkata ajanga Dimapur nung June 1 & 2, 2023 anogotem #mPowerWomen@Work aser #mPowerBusinessWomen sentong ayongzüka liasü, koba social enterprise Contact Base aser YouthNet nati yaritepa liasü.

Iba senden ya 'Women Welding the Workplace' project nung shilem ka liasü.

2021 nungi tenzüka iba US Consulate Kolkata indang sentong ajanga South Asia aser talisa India, Nepal aser Bangladesh nung tetsür timbai mapa inyakba nung shilem agidaksütsü asoshi 'solution-based support networks' agütsür.

Ananü sentong ya Nagaland nung business atema maongka tasen adokba aser tetsürtem economic empowerment tsütsü timtem ajuruba, tetsürtem atema market angatetba aser bushiba, entrepreneurs aser tetsür temi anir aliba start-ups tem business mentors aser takotet nisungtem den sendaktepba aser hadir balala amshiyim nung rangloker ayongzüka liasü.

June 1, 2023 nü parnoki mesüktepa aliba tesemtem sema jaja aser iba sülen WWW project nung shilem ka ama sensaksem senden ka amen.

Iba mapang India aser USA nungi business expert temi Dhansiripar village, Chumukedima district nung Loinloom weaving cluster aser Chumoukedima district nung Jakahasen kin indang Bade village nung Baana Fiver extraction cluster semdanga liasü.

Iba sülen parnok Dimapur nung aliba Naga Express Bowl Café and Restaurant nung roundtable meet ka amen.

Iba senden nung Director of the American Center Kolkata, Adrian Pratt menden liasü aser yangji US nung aliba Black Woman Be Whole indang co-founders Kimberly M. Moore aser Ednesha Saulsbury, Task Force on Music & Arts, Government of Nagaland indang chairman aser YouthNet co-founder Theja Meru, Pro Rural NGO indang director Paul Lokho, Better Life Foundation tentetsang Sethrichem Sangtam,

Nino Zhasa, Managing Director of Explore Nagaland; Bambi Kavichusha, Fashion Designer aser Journalist; Toinal Chophi, Founder, Beauty Barn India aser Alemjungla Jamir, Founder of Naga Bowl Express aser Women Entrepreneurs Network züngsem tem dena liasü.

Ano June 2, 2023 nü Dimapur nung aliba YouthNet office ajanga #mPowerBusinessWomen meet ayongzüka liasü. Iba sentong Adrian Pratt-i semzüktsü aser senden nung menden liasü.

Iba mapang Women Entrepreneur Network Nagaland, North East Network aser Youth Net den külemi Educentre School of Business nungi teshimtet nisungtemi shilem agia liasü. Iba senden nung Joint Director, Sericulture Dept., Govt. of Nagaland & entrepreneurs Zachivelu (Achine) K. Dollie-ia shilem agia liasü.

Iba mapang Women's Economic Empowerment in Nagaland dak sendakba nung business expert aser business networks nungi nisung pongui shisa lemsatopa liasü.

Mokokchung Deputy Commissioner den tepila sentong agi



Mokokchung Deputy Commissioner mapa yutsür aosang Sashank Pratap Singh, IAS nem akum agüja DC Mokokchung indang Conference Hall nung June 2, 2023 nü tepila sentong ka agidang tangokba noksa nung Sashank Pratap Singh den Mokokchung Deputy Commissioner tasenba Thsuvisie Phoji, HoDs aser Civil Society tem nungi teshimtet nisungtem angur.

Dimapur, Aami/June 02 (TYO): Deputy Commissioner, Mokokchung mapa melenzüka yutsüsang Sashank Pratap Singh, IAS nem akum agüja tepila sentong ka June 2, 2023 nü DC Mokokchung indang Conference Hall nung agia liasü. Iba sentong nung Sashank Pratap Singh-i jembidang, jenjang mashi ka nung alitsü asoshi tesem tajungtiba rongnung Mokokchung ya ka lir, ta ashi. Pa Mokokchung nung aliba mapang ya Nagaland nung aliba rongnung tesadokba liasü aser tajangshiba tajung bener iba tesem yutsür, ta ashi. Pa Mokokchung nung Deputy Commissioner ka ama alidang kechi nungsa takok

nguogo, ya nüburtemi tashi angaba aser yariba ajanga lir, ta Sashank Pratap Singh-i ashi. Pai nüburtem dang Deputy Commissioner tasenba dena kasa teyaritep alitsü aser tashi angatsü ayongzüka liasü. Mokokchung nung aliba nüburtem temoatsü nung mapa tasen tajungtiba nung inyaksü, ta pai ashi. Mokokchung asoshi Deputy Commissioner tasenba, Thsuvisie Phoji-i iba sentong nung o tatsüka jembidang Mokokchung nung aliba nüburtem nungi shisa agitsü renema lir, ta ashi aser team ka ama mapa ajak takok ngua inyaksü asoshi yariang, ta nüburtem dang ashi. District aser nüburtem

tajungtiba nung tenzüksü temolungtetba nung lir, ta pai ashi. Iba sentong nung DPDB züngsemtem aser HoDs tenüng nung District Planning Officer, Imlikokba-i jembi aser Civil Societies Organization tenüng nung Ao Senden tir, All Ward Union Mokokchung tir, DC Staff tenüng nung PA to DC Limanungsang aser Administrative Officers tenüng nung ADC Mokokchung, Chumlamo Humtsoe nungeri o tatsütsü jembia liasü. Iba sentong nung menden EAC Mokokchung Vitolu Chishi liasü aser Associate Pastor, MTBA, Monglier Tzudir-i sentong tenzüka sarasadema liasü.

Press Club temi Watitola asükhu lemsatep

Dimapur, Aami/June 02 (TYO): Dimapur Press Club (DPC) indang executive member aser taoba tir Moa Longkumer tetsü Watitola asüba asoshi temolung khurema jashir, ta DPC sangdong ka ajanga ashi. DPC ajanga mangyimer kibong den asükhu lemsateper aser Tulusang Tsüngremi kinunger nem tashi agüjang ta sarasademtsür. Asür tanüla teti tatem maka tesunep nung

anisüngzükjang, ta sangdong ajangasa ashi. Dimapur Press Club indang executive züngsem aser taoba tir Moa Longkumer tetsü Watitola asüba osang angashia mangyim tejashi lemsateper, ta Kohima Press Club (KPC) sangdong ka ajanga ashi. KPC ajanga mangyimer kibong den asükhu lemsateper aser Tulusang Tsüngremi kinunger molung anisüngzükjang ta

sarasademtsür, ta sangdong ajanga ashi. Nagaland Page indang News Editor aser Dimapur Press Club indang taoba tir Moa Longkumer tetsü Watitola asüba tejashi lemsateper, ta Nagaland Press Association (NPA) ajanga sangdong ka nung ashi. Tang mangyimpa mapang NPA ajanga na aser ner kibong asoshi sarasademtsür, ta NPA sangdong ajanga ashi.

CMHSS Impur nungi HSLC & HSSLC tatidang nung takok angur tushia sentong ka agi



CMHSS Impur nung HSLC aser HSSLC nung takok angurtem, Principal, tesayurtem aser sentong nung shilem agirtem tangokba noksa.

Mokokchung, Aami/June 02 (TYO): Clark Memorial Higher Secondary School (CMHSS) Impur nungi taküm HSLC aser HSSLC tatidang nung takok angurtem nem tenungsang agütsüba sentong ka Hokulbarnü agia liasü. Iba sentong nung School Managing Chairman Wb.C.Wati Walling-i tajungshi o jembi aser CMHSS

Principal Wt.Chubainla ajanga takok angur kaketshirtem nem tetushi agütsüba mapang alakteta agi. Sentong nung Tsüngrem lenisüba jazüka Wb.Panger Ozükum-i sarasadem aser Meyilong aser Jongpongtsüla teloki temeja ken ka tena telok ajungmesoba den takok angurtem tenung nung Ao

Subject Topper Lensen-i (class 10) jembia liasü. Maneni nisung aseme atenba ken ka Sashi, Senti aser Meren nungeri tena telok lemladaksü, aser takok angur asoshi Tsüngrem nem tenungsang aguja sarasadema liasü. Iba sentong Wt.Merenchila ketdangzüba nung tiptema agia liasü.

Rehabilitation Centre atema Social Welfare Department-i metetdaksür

Dimapur, Aami/June 02 (TYO): Multi-Disciplinary GIA Committee senden ka January 31, 2023 nü amendang lemtetba ama, state nung Integrated Rehabilitation Centre for Addicts (IRCA), Deendayal Disabled Rehabilitation Scheme (DDRS) aser Integrated

Programme for Senior Citizen/ Older Person (IPSRC/IPOP) amenoktsü bilema aliba NGOs ajunga inyaksangshi asadangtsü atema Deputy Commissioner ajanga Directorate of Social Welfare nung register asütsüla, ta sangdong ka ajanga metetdaksü.

DoSE ajanga ATL Tinkerpreneur 2023 atema metetdaksür

Dimapur, Aami/June 02 (TYO): Directorate of School Education ajanga sangdong ka nung ashiba agi, Atal Innovation Mission ajanga ATL Tinkerpreneur 2023 sayaogo, koba June-July nung hopta tenet virtual summer Bootcamp ka lir, kong iba boot camp atem dang kaketshir nem tongtipang digital skills aser online venture atema frameworks sayur alitsü. Taoba Bootcamp nung 5000+ team innovations liasü aser item rongnung temaba jenjang 100 nung alir nem Indian School of Business ajanga internship aser senotsü maongka agüja liasü.

'pitch decks' agütsütettsü. Hopta shia digital, product aser entrepreneurship skills nung kaketshir atema expert sessions alitsü aser tali tejangjaba nung inyaksü atema mapa agi inyaka sayuba session tem alitsü. Bootcamp ya school ajak (ATLs aser non-ATLs) asoshi alitsü. Kaketshir nem kulizüng kaket, internships aser danga maongka tajungtem agütsütsü. Iba camp nung adentsü asoshi June 5, 2023 tashinung tenüng agütsütsüla. Kaketshir temi <https://kid-ex.com/champions/atlnkr2023> nung tenüng zülüoktsü akok. Iba dak sendakba nung High aser Higher Secondary Schools (Government aser Private) ajak indang tekolak pur dang iba sentong nung shilem agitsü asoshi kaketshir dang ajungshitsü metetdaksü.


Register süa aliba team shia nem Bootcamp tepiyong Mentor India initiative nungi 'mentoring support' meja-meja agütsütsü. Bootcamp ya June 8 nung tenzüksü aser July 24 tashi alitsü. Kaketshir temi August 6 tashinung pei indang

Kiphire nung World No Tobacco Day amung

Dimapur, Aami/June 02 (TYO): Kiphire district kübok health units aser kaket reju ajak nung May 31, 2023 nü "We Need Food Not Tobacco" omen kübok World No Tobacco Day munga liasü. Iba anogomung indang sentong tuluba ya Government Higher Secondary School Kiphire nung agia liasü, kong kaketshir 450 dak tema den tesayur aser H&FW department nungi staff tem dena liasü. Iba sentong nung ADC Kiphire, D. Robin ajanga Essay aser slogan writing competition nung takok angur nem sempet agüja liasü. Pai district nung lanurtem atema IEC material agizüka aliba sayaja Tobacco-Free Youth Campaign tenzüka liasü. Kasa mapang pai kaketshir dang moko aliba oset nungi pila alitsü aser lesson azüngba nung tali temolung agütsütsü ajungsjia liasü. Iba sentong indang omen "We need food not tobacco" nung ajemdaker Dr. Manen Konyak, Neurologist, District Hospital Kiphire ajanga moko lu ayimer asoshi temelen aonsotsü züsesntü aser marketing opportunities atema awareness agütsütsü jembi aser temang

anema alitsü asoshi chiyongtsü tajungtem züsesntü ajungshia liasü. Moko achiba ajanga temang nung tashidak balala adokba aser tenük-telen ajak nung timtem agütsüba indang pai kaketshir dang rasaa ashi. Moko ajanga nokdangtsü akokba tashidak tem adokdaksür aser moko achir kisüng masü saka kinunger ajunga timtemdaksür, ta pai ashi. Kasa sentong nung Vice Principal Lhoukuo ajanga taküm NBSE tatidang nung subject topper nem konang tetushi agüja liasü. Dr. N. Moa Jamir ajanga Nagaland nung tang moko achiba indang data tasenba lemsateper aser moko ajanga temang nung timtem agütsüba indang PowerPoint agüja kaketshir nem awareness agüja liasü. Iba sentong nung GHSS Kiphire ajanga temeja ken ana aten, Dr. R. Chubala Aier ajanga pela agizükba o jembi liasü. Maneni Junior Dental Surgeon, Dr. Wekhro Mero lenisüba kübok Anti-tobacco pledge agi, kong Counselor Thripili menden liasü aser Seli Anar-i melepzüng o jembi liasü.

TEPELA TASOBA ANOGO



Tsüngrem temeim agi
Mr. REPAJOJANG IMCHEN,
H/o. Mrs. Malemla

tanü 3rd June 2023 agi küm 90 (Ninty years) junga taküm arishi agütsü nung kinungertem ajaki tenüngsang agütsür aser teyanglur Tsüngrem dang anema aliba aser arishi agüjang ta sarasademtsür.



CIRCULAR ROAD BRANCH
Ground Floor, Faith Building,
Near Khermahal Traffic Point,
Dimapur, Nagaland- 797112
Email: vjdima@bankofbaroda.co.in

[Rule 8(1)]

KIOJEN AGIADOKBA NOTICE

Securitisation and Reconstruction of Financial Assets and Enforcement of Security Interest (section) Act, 2002 aser Security Interest (Enforcement) Rules, 2002 Section 13(12) den Rule 8 & 9 nung agüja aliba tashi amshia **Bank of Baroda, Circular Road Branch, Dimapur, Nagaland** nung Authorised Officer-i **30.12.2021** anogo nung Demand Notice ka ajanga **MR. CHINNY MAGH (BORROWER)** House No.208, Industrial Village, Razhuphe, Dimapur, Nagaland State- 797112 aser **MRS. NAOMI MAGH (CO-BORROWER)** House No.208, Industrial Village, Razhuphe, Dimapur, Nagaland State- 797112 na dang notice agütsüba anogo nungi tenzüka anogo roker (60) tsüngda notice nung shia aliba ama **Rs.1,11,10,006.32 (Rupees One Crore Eleven Lakhs Ten Thousand Six and Paise Thirty Two Only)** agüjang ta tuyua liasü.

Sen apuri seni magütsütet, anungji sen apur aser public dang, tsünglanglen sign süa aliri iba Act nung Section 13 kübok Sub-section (4) aser Security Interest (Enforcement) Rules, 2002 kübok Rule 8 nung agüja aliba tashi amshia **2023 küm May 30 anogo** nung tsünglanglen shia aliba kiojen agiadokogo ta sangdonger.

Talisa sen apur aser public dang iba kiojen dak sendakba nung kecha inyaksangshi masütsü metetdaksür, iba kiojen dak sendakba nung inyaksangshi süra ibaji **30.12.2021** anogo tashi nung **Rs.1,11,10,006.32 (Rupees One Crore Eleven Lakhs Ten Thousand Six and Paise Thirty Two Only)** den sen tetemlok ajak Bank of Baroda meyong asütsü.

Sen apur dang iba Act nung Section 13 kübok sub-section (8) nung ajemdaker mapang shidak nung kiojen alangzütsü metetdaksür.

Mortgaged asüba kiojen osang tejangja:

Padumpukhuri, Dimapur nung Shri Chinny Magh, S/o Late Ashiwa Magh tenüng nung aliba Patta No.1202, Dag No.295/1671 nung ali tasazük 0B-1K-18L aser building.

North tsütsülen: Lanu Ao kimong, **South tsütsülen:** Approach Road, **East tsütsülen:** N. Konyak kimong aser **West tsütsülen:** Bohovi Awomi kimong.

Date: 30.05.2023
Place: Dimapur
Authorised Officer
(Bank of Baroda, Circular Road Branch)

Sorkari Brij aputsüla, mesüra aluyimertemia longkak aittsü: Rakesh Tikait

New Delhi, Aami/June 02 (Agencies): Hokolbarnü Haryana state kübok Kurukshetra nung aluyimertem senden ka tembangba sülen osangbenertem den jembidang aluyimertem lenir, Rakesh Tikait-i, sorkari Wrestling Federation of India (WFI) tongti, Brij Bhushan Sharan Singh aputsüla, mesüra aluyimertemi June 9 nü Jantar Mantar-i oa longkak aittsü, ta metetdaksü.

Tikait-i, "Sorkari wrestler temi akhangba langzütsüla aser pa (Brij Bhushan Sharan Singh) aputsüla, mesüra onoki June 9 nü wrestlers den külemi Jantar Mantar-i oa longkak aittsü aser linük tesem ajaklen panchayats ayongzütsü," ta metetdaksü.

Bharatiya Kisan Union (BKU)-i Uttar Pradesh kübok Muzaffarnagar nunga lokti senden ka ayongzüka liasü aser iba senden



nungji aluyimer lenirtem telok kati linük Tir, Droupadi Murmu ajurua wrestler temi akhangba agizütsü atema mepishitsü telemtetba agia liasü.

BJP MP, Bhushan ya Wrestling Federation of India (WFI) nung tongti aser pai India tsür wrestlers dak tim mesüi bentshia lir, ta pa nem tai tonglokja wrestler temi tesüiba

ita aika Jantar Mantar nung longkak aita arudar.

Tikait-isa, longkak aiter wrestlers kibongtem amokmerendar, anungji parnok nem security agütsütsüla, ta takhangba agütsü.

Tawa Olympic medallist Bajrang Punia, Sakshi Malik, international wrestling champion Vinesh Phogat aser Sangeeta Phogat nungeri longkak aita Parliament building tasenbai aodang police den rara adokba sülen Dehi Police-i Jantar Mantar nungi longkak aitertem meindokogo.

Bhushan-i osangbenertem den jembiba o dak sendakba nung Tikait-i, "Protection Of Children from Sexual Offences (POCSO) Act kübok ken o aika benoka alisang nem o jembitsü atema maongka agütsür ajisüaka sorkaribo kecha mejembir," ta aitsü.

Law Commission-i Uniform Civil Code atema inyaksüa akok: Justice Desai



New Delhi, June 02 (Agencies): Law Commission-i Uniform Civil Code (UCC) atema inyaksü tebilemba lir, ta Hokolbarnü Justice (Retired), Ranjana Prakash Desai-i metetdaksü.

Desai-i Law Commission chairperson aser züngsemtem

ajurua senden amenba sülen lai iba osang ya metetdaksü.

Uttarakhand nung UCC atema drafting committee nung tongtiji la lir.

Desai leniba nung Uttarakhand committee-i Law Commission Chairman Justice (Retd.) Ritu Raj Awasthi den züngsemtem K T Sankaran, Anand Paliwal aser D P Verma nunger ajurua senden amenba sülen lai, "Iba ya onoki odang semdangba liasü, kechiyong onoki iba (UCC) atema inyaker aser parnokia iba (UCC) atema inyaksü tebilemba lir. Parnoki onok dang maparen koma inyakdar, ta asüngdang anungji onokia tebilemba kar lemsatepogo," ta metetdaksü.

Uttarakhand UCC committee-i benokba inyakymiji linük jenjang nunga kasa inyaksü akok asü?, ta asüngdangba langzüdang Desai-i, "Onoki yamaji südaktsüner; tanga state temia kasa inyakym bentshi

nungbo ajungtsü," ta ashi.

Yaküm Uttarakhand nung assembly election atema nüboyimba mapang nung BJP-i state nung party-i takok ngura UCC mapa küma benoktsü, ta nangzüka liasü.

Election atema nüboyimdang BJP lenir aser Uttarakhand Chief Minister, Pushkar Singh Dhama-i, BJP-i maneni takok ngua sorkar kümra UCC benoktsü atema mongintemi akümba committee ka tentetsü, ta nangzüka liasü.

Tang linük nung tamangba yimsü balala atema personal laws balala lir, ajisüaka UCC ya mapa küma benokra ajak atema personal laws ji kasa dang asütsü.

BJP-isa Karnataka, Gujarat aser Uttar Pradesh state tem nunga UCC mapa küma inyaksü nangzüka liasü. UCC pusemertem aikati, tetsür-tebur tebendang makai ajak kasa temeden angutsü atema UCC ya nüngdak, ta bilemer.

Karnataka sorkari election mapang nangzüka ajak mapa küma inyaksü

Bengaluru, June 02 (Agencies): Hokolbarnü Congress lenir aser Karnataka Chief Minister, Siddaramaiah-i, taoba state assembly election nung Congress-i nangzüka ama onük pongu mapa küma inyaksü, ta metetdaksü.

Chief Minister Siddaramaiah-i, state cabinet-i tenangzüka onük pongu nung o jungjunga lemtepogo

aser tan financial year nungi inyaksü telemtetba agiogo, ta metetdaksü.

Bengaluru nung osangbenertem den jembidang pai, kin mesüra tamangba yimsü kecha mebendangi nüburtem nem kasa teyari agütsütsü, ta metetdaksü.

Cabinet senden tembangba sülen pai, "Tanü onok cabinet senden ka menogo. Onoki tenangzüka onük

pongu jungjunga shisadanga jembio. Tan financial year nungi ajakji mapa küma inyaksü onoki telemtetba agi," ta metetdaksü.

Assembly election mapang nung Congress-i nüburtem dang nangzüka onük ponguji- ita shia kibong shia nem electric light unit 200 angati agütsütsü (Gruha Jyoti), kibong shia tetsüti nem ita shia sen 2,000 teyari agütsütsü (Gruha Lakshmi), ita shia below poverty line (BPL) kibongtem nem züngsem shia jang seret 10 angati agütsütsü (Anna Bhagya), küm ana atema graduate ser mapa mengui alir lanur shia nem ita shia sen 3,000 aser diploma holders shia nem sen 1,500 agütsütsü (YuvaNidhi) aser tetsürtem public transport bus nung angati senzüdaksütsü (Shakti) tenangzükbatem lir.

Assembly menden 224 aliba Karnataka elections nung Congress-i menden 135 nung takok angu, BJP-i menden 66 aser Janata Dal (Secular)-i menden 19 ngua liasü.



DIMAPUR BRANCH
Nyamo Lotha Road (Church Road)
Dimapur- 797112, Nagaland, Email: dimapu@bankofbaroda.com

KIOJEN AYOKTSÜ ATEMA NOTICE
APPENDIX- IV-A [See proviso to Rule 6 (2) & 8 (6)]

Securitisation & Reconstruction of Financial Assets and Enforcement of Security Interest Act, 2002 den külemi Security Interest (Enforcement) Rules, 2002 indang proviso to Rule 6 (2) & 8 (6) kübok Kiojen ayoktsü atema E-Auction Sale Notice. Public aser talisa sen apur (tem) aser Guarantor (tem) dang, Secured Creditor, **Bank of Baroda, Dimapur Branch, Dimapur, Nagaland** den mortgage asüba tsünglanglen shia aliba kiojen Authorised Officer of **Bank of Baroda, Dimapur Branch, Dimapur, Nagaland**, Secured Creditor-i tsünglanglen shia aliba sen alangzütsü atema "kiojen aliba tesem", "yangji aliba ama" aser "yangji aliba ajak" ayoktsü sangdonger.

Sen apur/tem/ Guarantor/tem / kiojen/tem sentsüh / Reserve Price / e-Auction anogo & mapang, EMD aser Bid ajungketba sen osang tejangja tsünglanglen agütsür:-

Agidokba jenjang: Physical

Kiojen repringdangba anogo aser mapang: 16.06.2023 & anepdang 10:30 ako nungi nikongdang 4:00 ako tashi

Sentsüh ajak senteper: 22.12.2021 anogo tashi nung Rs.1,20,74,427.74 (Rupees One Crore Twenty Lakhs Seventy Four Thousand Four Hundred Twenty Seven and Paise Seventy Four Only) aser iba denji külemi sen tetemlok aser tanga charges.

| Sl. No. | Name & address of Borrower/s / Gurantor | Kiojen aser osang tejangja | Date & Time of E-Auction | Reserve Price, EMD amount, Bid Increase Amount. |
|---------|--|---|----------------------------------|---|
| 1 | 1. MR. SUBASISH DAS (BORROWER) Proprietor of M/s. New Zoom Colour Lab, T. S. Market, N L Road, Dimapur, Nagaland State- 797112. 2. MRS. SARBANI DAS (CO-BORROWER) House No.11, Sematilla Colony, Dimapur, Nagaland State- 797112. | Block No.8, Mouza No.3, Dimapur nung Shri Subasish Das, S/o Himangshu Ranjan Das tenüng nung Patta No.629, Dag No.13/730 kübok aliba ali tasazük 1B-00K-00L (14400 Sq.ft.). Bounded By:- North:- Huwato Chishi, South:- Sontosh Malakar, East:- Main Road, West:- Khehuto Kiba | 20.06.2023 1:00 pm to 3:00 pm | Rs. 1,80,00,000.00 Rs. 18,00,000.00 Rs. 1,00,000.00 |

Kiojen ayoktsü telatetba osang tejangja atema iba link nung agüja lir- <https://www.bankofbaroda.in/e-auction.htm> and <https://ibapi.in>

Date: 03.06.2023
Place: Dimapur
Authorised Officer
Bank of Baroda, Dimapur Branch



TIR YIMYIM YIMOBILEM (EDITORIAL)

DIMAPUR

KÜPTOKNÜ

AAMI 03, 2023

Manipur akhüm raksaogo

Northeast purtem rongnung mapa tajung aika nung alimai India metettsüsa inyaktetba purtemji Manipur nungertem lir. Parnok ya tokolok techira aser meranga inyakterem lir. Parnoki kechi mapa nung amdakdir, kanga temulung agüja inyaker. Aji oda, soruchioka parnoksa tajungba, süa parnokisa tajungba arür, gari aniba aser yanglushiba mapatem nunga Manipur nunger tetka maka. Aji oda, saisapong nunga India tenüng nung asayatsüsa asaya tapu balala nung Manipur nungi adoker. Iba jagi alimai Manipur nungerbo nisung ajak tekümdang aser tajung asütsü amai bilema kanga akümtsübur. Ajisüaka, tawa Manipur nung Manipur nungertemi India government dang parnok nema Scheduled Tribe jenjang agüjang ta akangba onük nungi menatepa oa Meiti o Kuki nunger na tsüngda ki dena rongtsütepa azü tokshi lendong tulu adokba yagi alima tsüngdang Manipur topur kanga mejungi kümogo aser la akhüm kanga mejungi raksaogo. Tatsüba agi, la dakbo kecha tai mali ser nung Mary Kom dena joko mera maket angur. All Tribal Students' Union, Manipur teloki anir Manipur lenden lima alir kiburtem Meiti nungertemi Scheduled Tribe jenjang meshiba anema lokti senden ayongzüka jajaba anogo nung sentong temer tesem tesem nung Meiti nungertem o Kuki nungertem na tsüngda lendong ataloker, joko, tanü agi ita ka ajunger. Ajisüaka, telok ana tsüngda azü tokshia tsükchitepba manener aser ita ka jakdang pei ki toktsür jena aoba meyipa moutetter. Mozü kidanga nisung tasümang aika tebushir mali tasümang ayudak yua lir ta angazüker. Timtembo scheduled tribe jenjang meshiba nungi tenzük saka tenla ki dena rongdokja apusoba agi alimai Meiti nungertem shitakba taginüabajibo Scheduled Tribe jenjang masü saka tanga tebilemba amai repranger. Atangji, Kuki nungertemi Meiti nunger jashitsüsa inyaka alitsüa akok, saka Kuki nungerbo Imphal nung government office nunga mapa meinyaktettsüsa aser pei kidanga melitettsüsa inyakba jagi tangar tai nung Meiti nungertem aibelener asütsü. Joko, mapang talangka Meiti nunger alidak Imphal lenden len Kuki nunger melitettsü aser Kuki nunger longsua alidak Meitie nungertema melitettsü, anungji Manipur ya taküm küm May 3 tashi nung aliba Manipur state amabosa masütsü. Imphal len alitsüabajibo yutsür, talisa, Medical azüngertema bendangertem ajak Manipur toktsür ogo, anungji parnok meyipa orr azüngtsü tasak kümogo. Nisung asoshi tashidak tulutibaji tetsübu ya lir. Aji oda, government-i tapu tapu ashiyonga pei mulungjang nungi tetsübuji moura, tsübuseta kodaser oa alitsü mesüra azüngtsü. Tang timtem adokba onükji Scheduled Tribe meshiba len nungi adokba lir, anungji Meiti nungertemi aji meshitsü aser tangar tenem kintem, talisa Naga aser Kuki nungertemi aji tagütsü ta shijen ashitsü, anungji Meitie nungertemi ST jenjang meshibaji anenadok ka mesüra Imphal nung Naga nungertem asoshia kodang kechi ataloktsüar memetetba tia ka nung lir. Ashi, tang amai Kuki nungertemi Manipur nungi razüka oa state mesüra Union Territory jenjang ka akangba mapang ya, Manipur nung alir Naga nungertemia kasajisa masüyonga tangsa Naga yimten tebilemtsü ken o ya tatem küma latettsüla ta akangtsü tim. Atangji, Manipur nung Naga nunger o Kuki nunger naji mulungdok tembarbo masü saka tang Meiti nungertemi ST jenjang meshiba anemba nungbo külemi longjemmer apusor. Aji oda, Naga nunger o Meiti nunger najibo tembar tajung ta masü saka taküm ajak bendanga agüja Manipur nung aliba Naga nunger lushi tilakata tanga state-i bener meyoktsü aser Naga nunger yimten nüchiso bushirtem den Manipur nungbo yimjung malitsü ta nokdakertemjibo Meiti nungertem liasü. Naga nunger temeten aser taginüba anema nokdak dangbo Meiti aser Kuki nunger naji külemi longjemmer nokdaker ser nung tang yabo parnok tsüngda rarateper. Ashiko, Manipur nung aliba Naga nungertem asoshibo ibai mapang tajung ka asütsü. Aji oda, Manipur nung aliba Naga nungertem asoshia tang ya Union Territory ka akümtsü mesüra Naga yimten ken o ya latettsü mapang tajung ka lir. Joko Manipur komo yabo talangka manepsü, anungji asenoka asenok dang ajungba ka inyaktsü mapangi akanger.

OLEMSABANG

Tir Yimyim Yimobilem ajanga anguba temoatsü lemsateper

Amenla Mar

Anogo shia Tir Yimyim nung Yimobilem tapak ajanga lokti issue balala tesayuba agutsüdang shisatsü kanga renloker. Iba ajanga Küm aika asen nubur mass educate sua arudagi. Tanu onuk ya kanga rongdak teinyaktsü tajung ka benokago ta belema tebilemba ka lemsatebner.

Ali telung nung rongsentem bushiteta tuteta agitsü shisadangdang ano ali tema nung asen tenük agi ngua aliba kedangsütsü asen Ao-Naga nungertemi angazüktshitsü nungdak ta belemer.

Tsürabur nungi angazükba awash tajung kaji arem yatai aodang. Taliba/ tanguba ajakbo magizüki karbo pa selen aru belema aser tarutsü asoshi ta anunga toktsü;

Alu bendoki aodang umrem mongmong, rebchi, aser aonsotsü ajak bo meyata karbo anunga toktsü.

Aremi aodang korisu, süngjanglijang ajakbo magizüki ya ser atema aser pei tembar atema ta yutsür atok. Tanübo repangdang tarutsü asoshi mebelemer.

Aonsotsü, sungjanglijang tanga aliba ajak agizükerang sungsang(branches) sungdongjia lepsuka toktsür atoker.

Ango(fish) apui aodang ayong ango ajakbo mesubtet kar bo sa anungzüka yutsür atok. Tanübo tzü mesena Tena asütsü mozü mora amshia ango puteber. Anungzüka toktsütsü Melina long ajak mekupdoka supmar yutsür. Tarutsü tia jungti mah ?

Tsüraburtem den Lemang nung senzüdang yim mesür arem mein nung süngdonglidong laoa lira mesoa süng agi tangeta yutsüba angu.

Tanü asen putu nung kibur ali mali memetet sung lebsaja, süngküm tongnu aoyar ...mashi mashi lepsa jajaba aiben ataloka arudagi.

Ya Koda ser aseni anir lanu putui item inyakyim ya melenshia inyakdaktsütsü sendong atonga tanaben tsürabur awashi libaliru tajung angazükdaktsü aser ali rongsen kedangsüba kanga junga angateta wazüka ayutsü metettsü tongtibang ta bellma lemsateper.

Urinary Tract Infections (UTI) agi timtemer asoshi temetettsü kar

Tzü junga maoba timtem (Urinary Tract Infections) ji ken putetterbo, shitakba agibo antibiotics chia kanga junga anepalutettsüla aser tanaben kasa timtem jagi mekangshitsüla. Anungji, iba timtemji koba ajanga adokar, ken jungjunga reprangdangangma. Ibaji tebok junga mao wadaka ayuba, tebok nung mesen aliba aser temang nung tzü mashilen jajaba (reflux) timtem aliba ajanga asütsüa akok. Anungji, mapang shia natzü tendangtsüla aser bacteria mesenji koba amala ka ali, itemji metettsü merangtsüla. Iba jagi teti asoshi aneptsüsa mozü shitak agütsütettsü. Ajisüaka, iba ama anepaluba jagi mejungra, iba timtemjibo tzü aoba lenmang nung masü saka tezüng nung mesüra tezüng nungi poktsütemi tzü aoba tezü nung long aliba agi asütsüa akok. Ibaji süra, teberem ashitsü, saktsünütsü atutsü, temang metaa shirangtsü mesüra tzü aodang azü dena alutsü. Iba ama timtemji alidang teti temang aser tzü aolen ajak kanga junga merüka ayutsüla saka sapon tesashi mamshitsüla.

Tetsürtem asoshi peisasa tesülen aser tejaklen shidoktsü tongtipang. Tzü peria jemang aser natzü manah mapang talangka arema malitsüla.

Source - Prevention, Internet.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Jesus Movement anogomong nung nisung 4,166 baptiogo



May 28, 2023 nü Jesus Movement tenzüker küm 50 ajungba anogomong nung California tzüymkümlen aliba Pirate's Cove nung nisung 4,166 tzü nung baptiba sentong agidang tangokba noksa nung angur.

June 02, 2023: Jesus Movement tenzüker küm 50 ajungba anogomong (May 28) nü California tzüymkümlen nisung 4,000 dak temai Yisu Khrista agizüka tzü nung baptiogo.

'Baptize SoCal' ta ajaba sentong ya alima puti otsü nung tzü nung baptiba sentong tulutiba lir, aser iba sentong ya Oceans Church-i ayongzüük.

Iba sentong nung adener kati Instagram ajanga, "Iba sentong ya ni kodanga mamatsü," ta ashi. California tzüymkümlen aliba Pirate's Cove nung nisung 4,166 tzü nung baptibaji sentong nungji Arogo 280 nungi nisung 8,000 shi aden.

West Coast Life Church nung pastor, Ray Gene Wilson-i Instagram ajanga, "Koda tesümgangtsü aser puti otsü anogo ka. Pirates Cove nung nisung meyrjang aika baptiogo, Tsüngremi California nung mapa inyaker!" ta lemsatep.

Iba sentong nung adener kati Instagram ajanga, "Iba ya tesümgangtsüka lir. Yisu Khrista den takum tasen tenzükerterem ajak asoshi sarasademtsür. Kibubar kibong nung ajak pelaa agizüker," ta lemsatep.

Tekülem aser tetushi lenir, Lindy Cofer-i social media ajanga, "Arogo taküm lir! Jesus Movement küm 50 ajungba anogomong nung yashi Southern California tepor kanga junga liasü!!! " ta lemsatep.

Videographer, Eddy Ferguson-ia social media ajanga, "Nisung ka tzü nung baptiba kuli süa repringbaji temoatsü tulu saka khen nung tesem ka nung nisung aika baptibaji kanga tesümgangtsüka liasü. Iba ya küm 50 tejaklen 'hippies' temi inyakba amai liasü," ta ashi.

Jesus People movement aser Pirates Cove nung baptiba naprongla 'Jesus Revolution' film nunga lir. Iba

film ya taküm February ita nung theaters nung sayaa liasü.

2015 küm Jon Erwin-i mezüing "Jesus Revolution" film yanglutsü apiteta liasü. Jesus Revolution film ya America nung puti otsü nung revival tulutiba adokba otsü nung ajemdaker yanglu.

"Jesus Revolution" film otsü nung, 1970s mapang pastor Greg Laurie den lanur kari West Coast nung ochi aser taküm nung chichiba tetezü bushi tenzüker. Iba mapang nungji Greg Laurie-i lanur evangelist, Lonnie Frisbee ajurur. Sayutsüingir jagi pa den Yisu Khrista osangtajung lemsateper aser lanurtem dang Tenla kidangi arutsü ajungshir.

Iba film nung Kelsey Grammer-i Pastor Chuck Smith shilem agir, Joel

Courtney-i Greg Laurie aser Jonathan Roumie-i Lonnie Frisbee shilem agir.

Laurie ya Harvest Christian Fellowship nung tongti lenir aser osangbenertem den jembidang pai, pai 1960s aser 1970s nung ajangshiba tensa mapang den tang ya khenyongi balaka, kechiyong tang putu nungbo lanurtemi tejashi ajurur, mental health tsütsü timtemer aser taküm nung telangzüba balala bushir, ta metetdakja liasü.

Arogo lenirtemi pei wadang nung tamakok anguba dak sendakba nung Erwin-i, iba film ya pastor tem atema tayongzüka ka asütsü aser loktilibai sendokba lanurtem nem Tenla ki kishi lapoktsütsü atema ajangshiba film asütsü, ta metetdakja liasü.

Nigeria nung Fulani teloki Pastor ka densema Khristan 43 tepset

Abuja (Nigeria), June 02 (Agencies): Taoba ita Nigeria nung Nasarawa state kübok Khristantem aika aliba yimtsüing ana nung Fulani teloki pastor aser pa kinüngtsü na densema Khristan 43 tepset aser ki aika rongdoktsüogo.

May 11 aonung nungi May 12 anepdang tashi Karu County kübok Takalafiya yim dak amakdang Evangelical Church Winning All (ECWA) nung pastor, Rev. Daniel Danbeki aser pa kinüngtsü na den yim dak Khristantem aika tepset, ta yim daklirtemi metetdaksü.

Fulani Muslim telokisa iba yim anasa aliba Gwanja yim amak, ta ECWA District Church Council chairman, Rev. Danladi Ndoh-i metetdaksü.

Ndoh-i sangdong ka ajanga, "Parnoki amakba mapang nungji ozü pastor tem rongnung ka, Rev. Daniel Danbeki aser pa kinüngtsü na den tanga Khristan 43 tepset," ta

metetdaksü.

"Iba dak alia Tenla ki rongdoktsü aser yimtsüing ana nung ki aika rongdoktsü," ta paisa ashi.

Takalafiya yim dak alir, Livinus Dandaura-i, Fulani teloki aonung 9:00 ako nungi tenzüka anepdang tashi amak, ta metetdaksü.

Osangbener den jembidang pai, "Amakba mapang asürtemji teimbaka tetsür tanurtem aser tantsürtamburtem liasü, kechiyong Muslim nung kiralongrartem aser Fulani teloki prangpong amshia amakdang parnoki jena moutet," ta metetdaksü.

Yim dak alir, Isaac Dabu-i, yriua alirtemji Keffi nung aliba public health facility Federal Medical Center nung treatment agi, ta metetdaksü.

Dabu-isa, "Ni tejashi nung ya zülur, kechiyong ni anogo shia Keffi nung aliba Federal Medical Center semdanga Fulani aser kiralongrartem

ANOGO ABEN TSÜNGREM DEN

Nemzükba Nungi Temeshi Aini Aoba (T. Ken 107:1-8)

Tenüngsang Ken 107 nung olung ka pezüben tashi amshiba angur: "Pai ajungba asoshi, aser nisung chirtem den Pa tesümgangtsü mapa asoshi nisungtemi Kibuba tenüng sangdakjang" (t.8). Ken züluri Tsüngrem asenok asoshi inyakba mapa pungu tatishitsü aser asenoki kechiba Pa tenüng asangtsüla, iba indang zülu. Pai nemzüa alir, tepuokertem, mozü kidang shiranga alirtem, tzüym nung senzürtem, yimti yanglutsü bushirtem aser metsü proker indang jembir.

Tenemzürtem indang ken züluri zülu, "Parnok arem nung azümgmeyakdak nemzü, parnoki nisung aliba yimti mangu. Yaseta aser tzüraseta, parnok tanela parnok dak lulaa kümadok: Idangji parnok timtem nung parnoki Kibuba dang ayimten. Aser Pai parnok timtem nungi kümzük. Parnok nisung aliba yimli alitsüsa, Pai ano parnok temetongbai ani. Pai ajungba asoshi, aser nisung chirtem dang Pa tesümgangtsü mapatem asoshi, nisungtemi Kibuba tenüng sangdakjang" (t.4,7). Tsüngremi parnok kümzük. Aser ibaji lephsia aten. "Pai ajungba asoshi, aser nisung chirtem dang Pa tesümgangtsü mapa asoshi, nisungtemi Kibuba tenüng sangdakjang." Tsüngremi ibaji na asoshi inyak, anungji Pa tenüng sangang.

Kibubai meküzmükdang ni tenemzür ka liasü- kija azümgmeyaka, yaa, tzüraa, nükjitung maka aser kongi aotsü memeteti nemzüa liasü. Khrista kangki nung asenok menen asoshi asüba, aremba, aser asem nü lir shia aruba aser tanü ajak Kümtetdakba akümba ajanga, tanü asenok kija rongjena, yaa, tzüraa malir. Kechiaser Khrista taküm chiyongtsü; Pa Taküm Tzü lir. Ni Kotaki aoba leman temeshi aini aoba leman nung lir.

Tsüngrem ajungba aser Pai aniba shisadangang. Nai Pa tenüng asangtsü tim. Pai na temerenshi nungi kümzük. Na tenemzür nungi temeshi aini aor kümdaktsüba atema Pa tenüng sangang.

yirutsüba ozü nüburtem ajurur. remtsüogo, ta Dabu-i

Ajisüaka sorkar ketdangsertem shingaia iba hospital mesemdang aser teyari magütsü," ta ashi.

Paisa, "Item Khristantem ya Tsüngrem taochi agi dang yaritsü, kechiyong parnok medical bills teimba dang adoker aser shingaia teyari magütsür," ta metetdaksü.

Hospital nung medical teyari junga magütsüba ajanga yirua alir Khristan pezübo süogo.

"Nasarawa state sorkari item tatalokba atema kecha mashir aser prokshia aliba Khristantem meyarir. Khristantem aika Nasarawa state aser anasa aliba Abuja nung prokshia lir," ta pai ashi.

Asürtem rongnung nisisung tenetbo Dabu'er kinüngertem liasü.

Nasarawa state sorkar aser security sepaitemi May 13 nü Takalafiya aser Gwanja yim dak na nung asür Khristan 43 ji leper ka nung dang

metetdaksü.

"Amakba mapang asür Khristan 43 tasümgangji parnok kibongtem den mejembitepi ketdangsertem leper ka nung dang remtsüogo," ta pai ashi.

Nasarawa nung deputy governor, Emmanuel Akabe-a Khristantem asüpila sentong nungji aden. Asüpila sentongji ECWA lenirtemi ketdangtsüa agi.

Akabe-i, iba tatalokba ya Nasarawa state sorkari bushisüngdangtsü aser aibelenertem pua temerenshi agütsütsü, ta metetdaksü.

Item tatalokba aija Karu Local Government Council chairman, James Thomas-i,

"Item ama tatalokba ya ni mangateter. Ni Khristantem dang süngjemtsü mepishir aser onoki security agencies den senteper aibelenertem pua ozüing tesashitiba kübok temerenshi agütsütsü, ta nangzüker," ta metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Ramiramia

- * (adv) mejangja, junga majitet (blur)
- Tantsür tambur akümdang tenük ramiramia akümer.

Ramokshimok

- * (adv) tangar mezümgmeshia merenshiba (oppress)
- India sepaitemi Naga nunger kanga ramokshimoka kangshi.

OLONG PAITEP # 6534

| | | | | | | | | | | |
|----|----|----|--|---|----|----|----|----|--|----|
| 1 | | 2 | | | | 3 | | 4 | | 5 |
| | | | | | | | | | | |
| 6 | | | | | 7 | | | | | |
| | | | | 8 | | | | | | |
| 9 | | | | | | 10 | | | | |
| | | | | | | | | | | 11 |
| | 12 | | | | | 13 | | 14 | | |
| 15 | | | | | | | | | | |
| | | 16 | | | 17 | | 18 | | | |
| | | | | | | | | | | |
| 19 | | | | | 20 | | | | | |

TIPIEN

- Chiyongtsü makai timatempa - (7)
- Tenüing atet - (3)
- Tez _ _ _ _ ng - (4)
- Nemjema bilem - (4)
- Tzü amshia ayimba lu - (5)
- Sü apuba lisü - (4)
- Tapok - (4)
- Masüa ta ashi - (5)
- Ozü tobur tajung ka - (4)
- Yimten tsüingda akangjungshitepba yimya - (4)
- Ayong ajangdanga yangluba - (3)
- Lumang / Alikong - (7)

LANGTSÜNGLEN

- Teka agi ambang - (6)
- Ozüngi temeten magütsü - (5)
- Tzü atsünga aliba tesem - (8)
- T _ _ _ k - (3)
- Teimba aküm - (4)
- Achi ajemtsü mungui kangshi - (8)
- Kecha mait - (6)
- Reprangtsü atema ayuba - (5)
- Aika masü - (4)
- Ozü ka - (3)

OLONG PAITEP # 6533 TELANGZÜBA

TIPIEN :

- Telok, 4. Aluru, 6. Ozüng,
8. Emk, 9. Kin, 10. Teti,
12. Süir, 13. Jen, 14. Ola,
16. Talak, 17. Mazük.

LANGTSÜNGLEN :


- Tenükjang, 2. Luden,
3. Kioktsü, 5. Lenti,
7. Tajangzük, 11. Teronem,
12. Sempa, 13. Jahaz.

NAI-A YA METETTER MA



I dagi ango dang mesüka yanglua akiba ki ka noksa nung angur. I ba ya Hyderabad yimti nung National Fisheries Development Department Regional Office lir.

Second 12 tsungda meputepi aliba 5 bushiang



GOVERNMENT OF NAGALAND DIRECTORATE OF TECHNICAL EDUCATION NAGALAND : KOHIMA-797004

NOTIFICATION

NO. DTE/ESTT-2/3/2016-17/ : The interested Candidates are hereby informed to collect a prescribed application form for Diploma Course outside the State during 2023-24 session from the Directorate of Technical Education, Kohima (Below New Secretariat Complex) on payment of Rs. 200/- (Rupees two hundred, only) with effect from 05-06-2023 to 13-06-2023 during all working days. The form may also be downloaded from the website www.dtenagaland.org.in and the fee should be paid while submitting the form printed in white paper (A4 size).

The last date for receiving the complete forms by hand is 13th June, 2023 after which no request will be entertained. The selected list of Candidates will be published on the 16th June 2023.

| Sl. No. | Name of course | No. of Seats | Eligibility |
|---------|---|--------------|---|
| 1 | 3 Years Diploma in Audiography & Sound Engg. | 1 | 10 + 2 Passed (Science 45%) |
| 2 | 3 Years Diploma in Motion Picture Photography | 1 | 10 + 2 Passed (Science 45%) |
| 3 | 3 Years Diploma in Film and Video Editing | 1 | 10 + 2 Passed (Any Stream 45%) |
| 4 | 2 Years Diploma in Applied Acting (Film & TV) | 1 | 10 + 2 Passed (Any Stream) |
| 5 | Civil Engineering | 1 | HSLC/ Equivalent Passed Certificate with Minimum 40% Marks on MATHEMATICS and SCIENCE |
| 6 | Computer Science & Engineering | 1 | |
| 7 | Electrical & Electronics Engineering | 1 | |
| 8 | Travel & Tourism Management | 1 | |
| 9 | Mechanical Engineering | 1 | |
| 10 | Electrical Engineering | 2 | |
| 11 | Printing Technology | 1 | |
| 12 | Photography | 1 | |

(Er. VIPULHOU LHOUNGU)
Director



GOVERNMENT OF NAGALAND DIRECTORATE OF TECHNICAL EDUCATION

0370-2270409
0370-2271432

Nagaland : Kohima - 797 004

NO. DTE/Estt/PLD-1/2023-24/4581

Dt. Kohima, the 1st June, 2023.

NOTIFICATION

This is to inform that the Department of Technical Education will be organizing 'Placement Drive' for all the passed out students of Polytechnics within Nagaland on 13th June, 2023 at Government Polytechnic, Kohima from 10:00 A.M. onwards.

Private Companies/ Firms like:- Tata Motors, Jio Company, Impact, Seyie Motors, Nissan Motors, Symbiosis, M/S Pele Khezhe Enterprise and Eastern Computers Agencies will be participating in the placement drive for job placement in their respective Firm/ Company.

Interested students irrespective of branches are informed to register online from the website www.dtenagaland.org.in under placement drive link on or before 10th June 2023, 4:00 P.M.

Sd/-

(ER. VIPULHOU LHOUNGU)
Director

TIPRA Motha-i TTAADC senotsü atema lungkak aittsü

Agartala, June 2, 2023
(Agencies): Tripura sorkari
Tripura Tribal Areas
Autonomous District Council
(TTAADC) budget indang sen
magütsüi aliba mereprang
nungbo lungkak aittsü ta TIPRA
Motha-i metetdaksü.

"TTAADC nem senotsü
peria magütsür aser iba ajanga
terenlok mapa aika anendaka lir"
ta Tripura leader of the
opposition aser TIPRA Motha
MLA Animesh Debbarma-i ashi.

"Taoba Left Front sorkar
mapang Financial Year shia
nung Rs 1, 000 crore budget

lemzükja liasü, saka TIPRA
Motha-i TTAADC
ketdangtsü tenezükba sülen Rs
586 crore dang lemzüksü aser
iba nungi tang aliba BJP sorkari
Rs 76 crore magütsü lir. 2022-
23 nung state sorkari sen
agütsütsü ta bilem saka parnoki
magütsü" ta pai ashi.

2022-23 financial year
atema budget ji Rs 619 crore
liasü aser state sorkari taoba
TTAADC indang budget nungi
Rs 60 crore magütsü lir ta
Animesh Debbarma-isa ashi.

Iba ajanga TTAADC-i
sorkar mapa inyaker nem itasen

magütsüteter saka state sorkari
iba atema tebilemstü mabener.
State aser Centre sorkartem
dang senotsü agüjang ta
rongshitsü atema TIPRA
Motha-i lungkak aittsü, ta pai
metetdaksü.

"Iba tensaji ajurura BJP-
IPFT sorkari tebilemstü khuret
abentsü aser parliamentary
elections nung iba telangzüba
angutsü. Iba khuret ya magienra
TIPRA Motha aser tanga
opposition party temi sorkar
anema inyaksü aser Lok Sabha
election nung BJP-i tamakok
angutsü" ta Animesh-isa ashi.

Bokajan nung Adivasi telungpur 39 temai adok

Bokajan, June 2, 2023
(Agencies): Hokolbarnü
Assam kübok Karbi Anglong
district nung Adivasi People's
Liberation Army (APLA)
züngsem 39 temai adokogo.

APLA telungpurtemji
Bokajan nung Assam Rifles
aser Assam Police tsüingdang
temai adok.

Chief Commander Sahil
Munda, Deputy Commander
Amar Singh Karmakar aser
Chairman Vijay Sona nungeri
anir telungpurtem temai adok.

Parnoki prangpong 31 bener
arua agütsü aser iba nung AK

series Rifles 3, pistols 19, rifles 5,
hand grenades 2 aser assorted
ammunition 216 rounds dena liasü.

APLA ya 2019 küm Adivasi
National Liberation Army
(ANLA) nungi razüka orr
tentetba telungpur telok ka lir.

Parnok temai adokba
sentong nung Assam Rifles
Inspector General Debajit
Mukherjee, Brigadier Sivkanta
Shukla Spear Corps, Karbi
Anglong Superintendent of
Police Sanjiv Kumar Saikia aser
tanga ketdangtsür aika aden.

"Sepaitemi yimjung aser
putepa alitsü asoshi meranga

inyakba ajanga parnok
olemtepdaki aruogo" ta IGAR
Debajit Mukherjee-i ashi.

"Telungpur 39-i Operation
Samarpan kübok yimjung aser
azükaru lenmang nung jajatsü
shimtetogo. Assam Rifles-i
lanurtem nem tenüngsang
agütsür aser aibelen lenmang
tamajung nung senzür ajak temai
adoktsü ayongzüker" ta
Mukherjee-isa ashi.

"Temai adokba telungpur
kinungertemia Security Forces
dang parnoki meimertem
kidangi anir aruba atema pelaba
metetdaksüogo" ta paisa ashi.

Pakistan: Imran Khan'er PTI lenir ka apu

Islamabad, Aami/June 02 (Agencies): Pakistan nung taoba ato kilonser Imran Khan'er party ktdangsür ka linük anüdoklen Lahore yimti nung pur anogo ka lir party den nokdaksü nangzük.

"PTI worker ajak dang ya shiner, nenok lenmang shidak nung lir. Nenok Pakistan asoshi nokdaker. Tasü itang. Nenok atsüngzuka tuo," ta arishi küm 77 tain Chaudhry Parvez Elahi-i Hokulbarnü video message ka nung ashiba pa Lahore nung aliba court ka matsüngdang nokdak dang par Pakistan Tehreek-e-Insaf (PTI) party ajanga saya liasü.

"Ni khenyongi tai mali aser ni asen judiciary dak tamang akar," ta PTI tiri ashi.

Elahi ya Punjab province indang chief minister anaben inyaka lir aser taoba hopta Lahore court ajanga pa indang protective bail magizükba sülen ochimashi ken o nung Brehostibar nikongdang par kidang lia apu.

Lahore nungi kilometre 125 shi pilar Punjab kübok par ki aliba Gujarat jila terenlok asoshi agütsüba sen million aika pai özüng alema agi ta ktdangsür temi Elahi dak tai tonglokja lir.

Elahi-i item taitsüba magizüker. Pa apuba ya yimteren tsütsü nungi lir ta PTI ajanga ashir aser tang sorkari par züngsemtem apuba nung shilem ka lir ta ashir. Iba dak sendakba nung nisung 90 shi party nungi anenogo.

PTI chairman Khan ya May 9 nü apuba ajanga pa bukumer temi longkak aita iba sülen par telok apu tenzük aser paia Elahi apuba aitsü aser ktdangsür temi yimten yimsüsür tejen ya meshidaki amshi ta aitsü.

(Maneni tapak 8 nung...)

Mexico police-i nisung shi sepa aliba juli 45 ngutet

Mexico City, Aami/June 02 (Agencies): Mexico anüolen Jalisco state nung taoba hopta lanur nisung tenet samar aliba bushidang nisung shi aser tenük-telen sepa aliba juli 45 tashi longren ka nung nguteta liasü.

Item juli ya Guadalajara küpok Zapopan municipality nung longren feet 120 shi lir ponglang nung nguteta liasü.

"Nisung tetsür aser tebur temang shilem balala sepa aliba juli 45 tashi agitetogo," ta state prosecutor office ajanga Brehostibarnü sangdong ka nung ashi. Iba tesem nung arishi küm 30 shi tsüngta tetsür ana aser tebur pongu May 20 samaba bushidang ktdangsürtemi item ya nguteta liasü.

Nisung tenet samaba osang ya anogo balala nung agütsü liasü, saka parnok ajak call centre kasa nung inyaker, ta bushisüngdang temi ngutet, aser iba call centre ya nisung temang shilem ngutetba tesem nungsa lir.

Forensic mongin temi item juli nung nisung kwi mesüra shirnok temang shilem sepa ali, itemji ano mejangjateti lir.

Özüng alema mapa tamajung

**OFFICE OF THE
LONGPAYIMSEN VILLAGE COUNCIL
TEPELA TENÜNGSANG LEMSATEPER**



MISS. AOTULA ÖZÜKÜM

Sd/-
(R. Meren Aier)
Chairman
Longpayimsen Village Council

Longpayimsen Rongsanger Putu aser Longpayimsen Senso sangertem ajak alima sanger tang tekong songteta tejak tentetsüsa Miss. W. Aotula Ozüküm, Mr. & Mrs. T. Watimeren Ozüküm, jala UPSC Civil Service Exam (2022) nung takok menden tajung anguba asoshi la den tepela konang tetushi tolu lemsateper.

Maneni la wadangtem ajak nung Tsüngremi takokba nung aniangma ta moatsür.

Sd/-
(Chubasosang)
Secretary
Longpayimsen Village Council

**OFFICE OF THE
MANGKOLEMBA CHUNGLIYIMSENTSÜR TELONGJEM
Mangkolemba : Nagaland
KONANG TETUSHI AGÜTSÜR**



Sd/-
Temjenmenla
President

M a n g k o l e m b a Chungliyimsentsür Telongjem ajanga **Kr. Sungdiben Kichu**, Mr. Imtitemsu Kichu aser Mrs. Imlinaro Lkr na jalai HSLC tatidang, 2023 nung Top 17th jenjang ngutetba tepela konang tetushi lemsateper.

La tarutsü jenjang bushiba nung Tsüngremi maneni moajangma.

Sd/-
Imlikumla
Gen. Secretary

**Office of the
KANGTSUNG STUDENTS' UNION
P.O. Tuli, Mokokchung : Nagaland
TENÜNGSANG TULU AGÜTSÜR**

Kangtsung Students' Union mendenti ajanga taküm 2023 HSLC aser HSSLC tatidang nung sensosanger kaketsahir shirnokisa takok ajanzükogoo, nenok ajak nem tenüngsang aser tetushi tulu den tepelaba lemsateper.

Maneni tarutsü anogotem nung nenok tazüngba wadang nung Tsüngremi len ania moajangma ta sarasademtsür.

Sd/-
Sp. Aotenzuk Jamir
President, KSU

Sd/-
Kr. Tenlamongla Longkumer
Gen. Secy., KSU

**Office of the
Pongen Kidong Mangmetong
H.Q: Mangmetong, Mokokchung, Nagaland
TEPELA OSANG LEMSATEPER**

1. **Kr. Imlimerenla Pongen**, D/o Wb. & Wt. Temjensoa, Lai NBSE kübok class 12 (Arts) tatidang nung temaba jenjang 8th buba ngutet. 
2. **Sb. Aremchang Pongen**, S/o Wb. & Wt. Mayangnok Pongen, Pai NBSE kübok calss 12 (Arts) tatidang nung 1st Div. ngutet. 
3. **Sb. Maongtoshi Pongen**, S/o Wb. & Wt. Temjensoa, Pai NBSE kübok class 10 tatidang nung 1st Div. ngutet. 

Item jala jabasotem dak alaka ano shirnokisa jenjang balala nung takok ngutetogo, nenok ajak nem Pongen Kidong Mangmetong-i konang tetushi agütsür. Teyanglur Tsüngremi nenok tarutsü lenmangtem nung temoatsü azükaru aser takok nung maneni aniangma.

Sd/-
Wb. Tekatemjen
Tir

Sd/-
Wb. Watitemjen
Tezülur

GS FOUNDATION COURSE

Be the next NCS



NPSC 2023

Be the next IAS




UPSC 2024

ADMISSIONS OPEN



TOP CIVIL SERVICE DOMAIN EDUCATORS



WELL RESEARCHED MATERIALS



THREE TIER TEST SERIES

📍 Kohima, BOC, below PHQ
☎ +91 7005114715



EduVersity
NPSC PREPARATION 2.0

Saudi Pro League ya alimanung league tajungtiba ka akumtsü: Cristiano Ronaldo



Riyadh, Aami/June 02 (Agencies): Tenüng tulu aketba asayatem tali puatetra Saudi Pro League ya alima nung tematiba league pongu rongnung ka akumtsü, ta Portugal nung Ronaldo-i ashi.

Lionel Messi, Karim Benzema aser Luka Modric nungertem Saudi Arabia-i arutsü amai osang angazüker, aser arishi kum 38 tain Ronaldo-i pa den külemi asayatsü pelashishia agizüksü, ta ashi.

Ballon d'Or sempet ponguben nguteta alisang Ronald pa December ita Al

Nassr nung arua dener mezüngbuba season tembangogo.

Pa indang contract ya 2025 tashi lir aser pa taruba season-a yangisa asayatsü, ta ashi.

Paris St-Germain-i Messi ya taküm meyi nung club yutsütsü ta jangjaogo aser Argentina nung arishi kum 35 tain football asayar mongin ya Saudi Arabia atema tourism ambassador ka lir.

Ronaldo den taoba mapang Real Madrid nungi külemi asayar Benzema aser Modric na par club nungi ainshitsü lenmang bushir amai osang angazüker.

"Parnok arura, asayar tenüng tulutem, lanur asayatem, 'asayar taintem', parnok kanga pela agizüksü, kechiaser yamaji atalokra league ya terabo tajungba akumtsü," ta Ronaldo-i SPL den sensaksemba mapang ashi.

"Iba league ya kanga junger, saka asenok aintsü asoshi ano maongka aika lir ama bilemer.

Iba league nung tetoktepa kanga lir. Yangi team tajung lir, Arab nung asayar tajung lir. Saka ki o jen tsütsü tera renloksü nungdaker. Referees, VAR system tera tekeraba asütsü nungdaker," ta pai ashi.

Manchester United nung Ronaldo tanaben asayaba taoba kum November ita pa indang contract tangatetep nung agiena tembanga liasü.

World Cup asayamung balala pongu nung goal agütsüteter ka akumba sülen pai asaya 16 nung goal 14 agütsüteta Riyadh nung aliba Al Nassr ya champions Al Hilal sülen lia asayamung tembang.

"Tilateri kar nung temelenshi kar nungdaker. Saka ni yangi pela lir, ni maneni yangi asayaner, ni maneni yangi asayatsü. Aser ni bilemba agi, parnoki inyaknuba ama yangi maneni inyakra, kum pongu tsüngta Saudi league ya alima nung tematiba league pongu rongnung ka akumtsü amai bilemer," ta Ronaldo-i ashi.

Gariphema nung 1st Unisex Marathon Race ayongzüka agi



1st Unisex Marathon Race nung takok angurtem den tongtipang nisungtem külemi tangokba noksa ka yangi angur.

Kohima, Aami/June 2 (TYO): Moko achiba ajanga temang aser lokti nung timtem agütsüba indang awareness agütsütsü nükjidong nung May 31, 2023 nü Botsa nungi Gariphema tashi 1st Unisex Marathon Race (12 kms jajaba aser asemba) ayongzüka liasü.

Iba sentong ya "World No Tobacco Day" aser Gariphema ya "Tobacco Free Village" sangdonger kum 9 ajungba nungtem nung Gariphema Village Student's Union (GVSU) ajanga ayongzüka liasü.

Iba sentong ya "Commit to quit. Yes to life. No to tobacco! Pledge to quit it" omen nung ajemdaker ayongzük aser Gariphema Village Council, NCRC, Department of Health & Family Welfare, Nagaland ajanga sponsor süa liasü.

Iba sülen Gariphema Village Council Hall nung sentong

tatsüka agi, kong shisalen sayur Dr. Neiphrezo Sorünüo, Junior Dental Surgeon, Naga Hospital Authority Kohima liasü.

Iba sentong nung Ghuzukha Kire, associate pastor NCRC Gariphema ajanga Tsüngrem temoatsü meshia sarasadem. Iba Marathon Race nung state kübok tesem balala nungi lanir 30 dena liasü.

Iba asemtepa nung Phek district kübok Chizami village nungi Wede T. Mero (42mms, 38 sec) ajanga mezüngbuba jenjang ngutet, Mokochung district nungi Taliyanger Ozukum (46min, 58sec) ajanga tanabuba jenjang, Kohima village nungi Lhouvisalie Mere (48min, 30sec) ajanga tasembuba aser Kohima district kübok Tsiemekhuma village nungi Atseibou Rüpreo (1hr, 6min) ajanga pezübuba jenjang nguteta liasü.

Thailand Open: India nung Lakshya Sen semi final tongogo

Bangkok, Aami/June 02 (Agencies): India nung Lakshya Sen-i Hokulbarnüa maneni kanga junga asayateta Malaysia nung Leong Jun Hao madak straight games nung takok ngua Thailand Open badminton tebur kina asaya semi final tongogo aser kasa linük nungi asayar Kiran George tsük.

Lakshya, shibai 2021 World Championship nung bronze medal nguteta liasü, pai Thailand yimtiba, Bangkok nung aliba Indoor Stadium Huamark indang Court No. 2 nung Malaysia nung Leong Jun Hao den quarterfinal asayadang 21-19, 21-11 agi akok.

Lakshya-i Honibarnü semi nung China nung Lu Guang Zu aser Thailand nung Kunlavut Vitidsarn tsüngta takok angur den asayatsü.

Hokulbarnü quarterfinal danga ka nung India nung Kiran George ya France nung Toma Junior Popov den asayadang tamakok ajurua liasü.

Arishi kum 23 tain Kiran George ya France nung jenjang 28 buba nung alisang den minute 41 asayaa 16-21, 17-21 agi tsük.

Leong Jun Hao den asayadang Lakshya tena points 10-10 liasü aser Malaysia nungba 16-10 agi timba akum. Ajisüaka BWF Rankings nung jenjang 23 buba alur alisang arishi kum 21 tain Lakshya-i meranga asaya tena 17-17 akum aser India nungbai mezüng sen 21-19 agi koka liasü.

Set tanabuba nung yimya balaka liasü aser Lakshya temaba süer asaya aru aser

Malaysia nungbai meranga asayaka 13-11 nungi Lakshya-i points ti atonga nguteta 21-11 nung iba set tembanga last four nung asayatsü jenjang angu.

Iba asayamung first round nung Kiran George-i China nung third seed Shi Yu Qi tsükdaktsü aser pre-quarters nung ano China nungisa Weng Hong Yang tsükdakja liasü.

Odisha Open 2022 akoksang Kiran George ya BWF World Tour Super 500 asayamung nung quarterfinal tang mezüngbuba asaya liasü, saka pai France nung Popov mamokbangteti tamakok ajuru.

Popov-i danga semi final nung Hong Kong nungi seed ti buba nung alisang Lee Cheuk Yiu den asayatsü, shibai danga quarterfinal ka nung Malaysia nung Ng Tze Yong madak 21-19, 23-21 agi takok ngua lir.



June 02, 2023 : Salalah, Oman nung India nung junior men's hockey team ajanga Men's Hockey Junior Asia Cup 2023 asayamung takok ngur tangokba noksa ka yangi angur.

Pakistan: Imran Khan'er PTI... (Tapak 7 nungi...)

"Jenjang kecha makaba nung Ch Pervez Elahi apuba ni khukhua aitsür. Pa apuba aser meshidaki amshiba yimya ya taktsüka lir," ta Khan-i tweet asü.

Elahi pur ghonda ishika lir Pakistan nung arishi kum 36 tain human rights activist aser lawyer Jibrán Nasir-a Karachi nungi mejangjaba nisungtemi pua bener ao ta ashir.

Kasa mapang Pakistan indang National Accountability Bureau (NAB) anema sen million \$53 alang tenüng menüksüba ken o ka Khan-i benoka lir, shirnoki ochimashi ken o benokba sülen pa pua liasü.

Hokulbarnü tweet ka nung Khan-i Nazir Ahmad Butt nem legal notice ka agütsü, shiba mitkar general mapa nungi anisüngzük ngur tang NAB tekolakba mapa inyaker.

"Ni aputsü totuyuba ya public holiday ka nung agütsü aser anogo ti tashi miimshia ayu. Al-Qadir Trust Case Inquiry nungi Investigation dangi melenba kü nem memetdaksü," ta Khan-i tweet asü.

"Islamabad High Court kima nungi ni pua tenüng menüksütsü nükjidong liasü.

Aser alima dang ni ochimashi ken o nung apu ta sayu," ta pai zülü.

Parliament nung confidence vote ka agitepa yimten yimsütsüba menden nungi Khan aitsüngdokba sülen pa anema ken o 100 dak tema benoka lir aser item ken o nung kiralongraba, azüdokshi ajungmesoba amala densema lir, aser ibai October ita national election agitsü aliba nung metoktepdaktsütsü mechi tasa yangluba lir ta ashir.

Pakistan sorkari nung minister temi Khan indang PTI party shibangtsütsü aser party tekolakba ken o military court ka nung jembitsü sentong lir ta ashir, koba rights group temi aitsür.

Pakistan nung March ita nungi Khan-i jembiba aser osangbener senden amenba nokdanga lir

Bodhbarnü Pakistan Electronic Media Regulatory Authority ajanga television channel tem dang tesempatem adokdaksür, ki o jen raksatsür aser item mapa inyadaksür television channel nung madoktsü tenokdangba agütsüogo, saka Khan mesüra par party tenüngbo tetshia mali.

BILEMDANGANG

"Tajung kisung masü saka langka kar atemabo tajung asütsü merangang."